

Molaodi e motjha wa yuniti ya Batho ba Ruileng Haholo

Tshwane, 18 Mphalane 2021 – Kajeno Ditshebeletso tsa Lekgetho tsa Afrika Borwa (SARS) di amohetse Mme Natasha Singh, setsebi sa tsa akhaonting se nang le boiphihlelo bo fetang dilemo tse 20, ho ba Molaodi wa Lekala: Batho ba Ruileng Haholo (HWI). Khomishenara Kieswetter o tsebisitse Mme Singh ho basebetsimmoho le ho basebetsi ka kakaretso mane diofising tse Woodmead e leng moo yuniti ena e ntjha e tlang ho ba teng mmoho le Lekala la Dikgwebo tse Kgolo le tsa Matjhabeng (LB&I).

Mme Singh o na le mangolo a thuto a *Masters* mme tsepamo ya hae e hodima tsa lekgetho. O ikamahanya le SARS ho tswa mane Eskom moo e neng e le Mophethahatsi wa tsa Ditjhelete: *Group Insurance and Tax*. Ho hirwa ha hae ke monyetla o motle mme ho bapile le palo ya ditlaleho tsa haufinyane tjena tse amanang lekala lena le bohlokwa la balefalekgetho, ho akareditswe le ditaba tse ntshitsweng morao tjena tse mabapi le se bitswang *Pandora Papers*.

Ho bapa le maikemisetso a mawala a SARS a ho nolofaletsa balefalekgetho dintho hore ba tle ba tsebe ho ikobela boitlamo ba bona ba molao, ho hirwa ha Mme Singh ke mohato o bohlokwa le o mawala ho thusa ho ntlafatsa boikobelo ba batho ba ruileng haholo le ba nang le ditlhophiso tse tshopodi tsa ditjhelete.

Mme Singh o itse, “Ke ananela ka boikokobetso monyetla ona wa sewelo oo ke o fuweng wa ho ba Molaodi wa pele wa yuniti ya SARS ya Batho ba Ruileng Haholo. Pelong ya ka ke mosebeletsi wa setjhaba mme ke dumela haholo tabeng ya hore matla a lokela ho sebediswa bakeng sa ho itseng. Ka ho nyalanya lerato la ka la tsa lekala la setjhaba le tjheseho ya ka ya sepheo, ke tshepa ho tliša tlotlo le kabelo e ntle Tshebetsong e Intshang Sehlabele ya SARS eo sepheo sa yona e leng ho sebeletsa Maafrikaborwa kaofela.

Khomishenara ya SARS Edward Kieswetter o itse, “Re ananela kabelo ya pokello ya lekgetho e tswang lekaleng lena ho ya ka mafapha a lona ka ho fapana Rephablikeng ya Afrika Borwa. Re boela re ananela hore ho ka nna ha ba le diphephetso tse ka nnang tsa hlaha, kapa tse teng tse mabapi le merero ya lekgetho mmoho le boitlamo ba lekgetho ba batho ka bomong mmoho le malapa a bona. Batho ba ruileng ba na le ho hlophisa merero ya bona ya tsa ditjhelete ka tsela e tshopodi ka dipopeho tsa kwano lapeng le tsa mose ho mawatle mme sena se ye se pate hore bonneteng ba na le eng le hore lekeno la bona la nnete ke lefe.”

Mong. Kieswetter o tlatsitse ka hore ditshenolo tse ntseng di tswela pele ho tswa bophatlalatsing ba ditaba ba lefatshe ka bophara tse mabapi le ditransekshene tsa ditjhelete tsa batho bana ba ruileng haholo ho phatlalla le lefatshe, ke taba e hlohang ho fuputswa ka nepo ke batho ba nang le mangolo a thuto a tshwanang le ana a Mme Singh. “Le ha boiteko ba rona ba sethatho bo akaretsa batho ba ruileng ba ka bang 1500 mmoho le ditheo tsa bona tse amanang le sena, re tla nne re tswela pele ho atolosa sena hore re qetelle re akareditse batho ba bang hape mmoho le malapa a mang.

“Le ha SARS e ikemiseditse ho thusa balefalekgetho ka boitlamo ba bona ba molao, ka tsela e tshwanang, mokgatlo ona o ikemiseditse ho fokisa le ho thibela ho se ikobe. Hodima moo SARS e keke ya mamella ho se ikobe tefo ya lekgetho mme e

tla thatafalletsa le ho etsa hore dintho di be theko e hodimo bakeng sa balefalekgetho ba jwalo ntle le ho tshaba letho kapa lona leeme,” ho rialo Mong. Kieswetter.

Mme Singh o qala ka mosebetsi ona wa hae o motjha mona SARS ho tloha ka la 18 Mphalane 2021. Boha setshwantsho se hoketsweng.

Ho fumana lesedi le fetang lena, ikopanye le SarsMedia@sars.gov.za